

PROTOCOL da la radunanza generala dals **30-05-2015**

Studio 2 SRF, Turitg, 10:30

Tractandas	
1.	Bainvegni
2.	Salid da Viktor Baumeler, president da la SRG.D
3.	Fatschentas statutaras
	3.1 Elecziun dals dumbravuschs
	3.2 Protocol da la radunanza generala dals 14 da zercladur 2014
	3.3 Rapport annual da la SRG.R per 2014
	3.4 Quint e bilantscha da la SRG.R da 2014 e rapport dal revisurat
4.	Ladina Heimgartner, directura RTR: sguard enavos – enavant
5.	Surdada dal Premi SRG.R 2015 a la chanceliera federala, dunna Corina Casanova. Laudatur: Mariano Tschuor
6.	Varia

1. Bainvegni

Il president, signur Oscar Knapp, salida ils preschents, spezialmain la diaspora da Turitg e da la Svizra Bassa. El engrazia a tuts che guardan televisiun rumantscha e taidlan Radio Rumantsch. Novs commembers sun fitg bainvegnids tar SRG.R.

Il president engrazia a signur Ruedi Matter, directur SRF, per l'ospitalisaziun en il studio da SRF a Leutschenbach. Salids speziels drizza el a la chanceliera federala, dunna Corina Casanova. Era divers represchentants da cultura e politica vegnian salidads, en emprima lingia dunna Isabelle Chassot, directura da l'Uffizi federal da cultura, signur Duri Bezzola, president da la Lia Rumantscha e signur Jon Carl Tall, president da l'Uniun da Rumantschs e Rumantschas da la Bassa che represchenta ils numerus Rumantschs che vivan en Svizra tudestga. La radunanza generala da la SRG.R vegn quest'onni geograficamain encunter ad els.

L'organisaziun da la SRG SSR è vegnida fermamain crititgada l'ultim temp en connex cun la votaziun da la LRTV dals 14-06-2015. La votaziun n'ha nagut da far cun la purschida da la firma. I vegn be decis dal sistem da finanziaziun. Ils commembers da la SRG.R èn vegnids infurmads en detagl tras in flyer.

Signur Gion Cola da la suprastanza sa stgisa per raschuns professiunalas urgentas.

2. Salid da Viktor Baumeler, president da la SRG.D

Signur Viktor Baumeler salida en bun rumantsch e survegn grond applaus per ses plets. El ha plaschair che la SRG.R vegn per l'emprima giada giu la Bassa per la radunanza. Signur Baumeler sa regorda dals cudeschs che eran impurtants durant sia uffanza: "Ursin", "Il retg da la Bernina", "Jürg Jenatsch", tut cudeschs situads en il Grischun.

Sin il Pass dal Güglia simboliseschan dus pilasters la Rumantschia e la cultura. Signur Baumeler sa regorda da las emissiuns dal "Balcun tort" e da la chanzun "Chara lingua da la mamma" ch'el udiva al radio Beromünster. Tras il militar e diversas enconuschientschas da la politica e da la SRG SSR è el vegnì en contact cun Rumantschs.

Signur Baumeler intuna il enritgiment da la Svizra tras il rumantsch e sia cultura. El conferma che la gulivaziun da finanzas tar la SRG SSR è il sistem adattà. RTR è bain integrà en SRF; la commemoranza da SRG.R tar SRG.D vegn apreciada.

Signur Baumeler finescha cun in citat dad Oswald Sigg, anteriur vicechancelier: "Per la Svizra è la SRG il fundament politic e cultural; i na dat naginas minoritads en la Svizra da la SRG".

3. Fatschentas statutaras

3.1 Elecziun dals dumbravuschs

Il president propona Jan Sedlacek e Gion Lechmann sco dumbravuschs. Els vegnan elegids unanimamain.

3.2 Protocol da la radunanza generala dals 14 da zercladur 2014 a Trun

Il president metta en discussiun il protocol da la radunanza generala dals 14-06-2014 a Trun.

Il protocol vegn approvà unanimamain cun in engraziament a la redactura Judith Schaniel.

3.3 Rapport annual da la SRG SSR Svizra Rumantscha (SRG.R) per 2014

Il president dat ina curta survista dal rapport annual SRG.R e da las fatschentas impurtantas tractadas durant il 2014. Il rapport dal president dal cussegl dal public Michael Spescha è scrit sin las paginas 6 e 7. Il cussegl dal public suonda la qualitat da las emissiuns RTR.

A la fin dal rapport sa chattan ils organs da la societad SRG.R. Sin pagina 15 ves'ins ch'ina finamira interna è cuntanschida, numnadamain d'arrivar a pli che 1000 commemberAs.

Las paginas 2 fin 17 ston vegnir approvadas da la radunanza da commembers e commembras. Lezza conferma il rapport annual unanimamain e na giavischa betg il pled.

Per l'avegnir appellescha il president d'acceptar la nova lescha LRTV revedida.

La dieta naziunala SRG SSR a lieu ils 25-09-2015 a Cuira. L'invit segua.

3.4 Quint e bilantscha da la SRG.R per 2014 e rapport dal revisurat

Il quint è publitgà sin las paginas 8 e 9 dal rapport annual.

Cun entradas da CHF 286'526.75 ed expensas da CHF 285'481.55 resulta in surpli da CHF 1'045.20.

Il president introducescha e metta en discussiun il quint. Il grond post d'entradas: las attribuziuns da la SRG SSR, cun ina summa da CHF 261'900.00. Era las contribuziuns da las commembras e dals commembers represchentan cun CHF 22'000.00 in'entrada impurtanta. Il president engrazia per quai.

I na vegnan fatgas naginas menziuns tar il quint. Il president dat il pled al revisur signur Andri Linsel. Il rapport dals revisurs è publitgà sin pagina 10. Il quint 2014 è manà da moda correcta ed ils revisurs proponan d'acceptar quel.

La radunanza approva il quint e la bilantscha per 2014 e distgargia la suprastanza.

4. Ladina Heimgartner, directura RTR: sguard enavos – enavant

Dunna Ladina Heimgartner, la directura da RTR, engrazia al president da la SRG.R per la buna collavuraziun e ses grond engaschament.

Ladina Heimgartner è dapi ils 01-08-2014 en posiziun. Ella preschenta sia squadra e la situaziun actuala e futura da RTR en ina preschentaziun, che sa chatta era sin www.srgr.ch.

5. Surdada dal Premi SRG.R 2015 a chanceliera federala Corina Casanova

Il president Oscar Knapp preschenta il curriculum da la chanceliera ed engrazia a dunna Corina Casanova per ses engaschi instancabel per il rumantsch e per ina Svizra quadrilingua. Tras sia lavur a Berna è Corina Casanova ina impurtanta ambassadura per il rumantsch.

Mariano Tschuor constatescha en sia laudatio ch’i dat chanceliers federals dapi il 1803 e che Corina Casanova è la 16avla en quella posiziun.

La chanceliera federala vegn elegida da l’assemblea federala a Berna, sia legitimaziun è pia ina democratica, vulida d’ina maioritad politica. Quai dat ad ella il status d’in magistrat.

Mariano Tschuor fa trais ponderaziuns en sia laudatio:

- la valor da las instituziuns
- il senn per l’equiliber politic
- la relaziun tranter minoritads e maioritads

Mariano Tschuor attribuescha a Corina Casanova in’auta professionalitad ed ina prudientscha politica singulara. Ella sa cur che la persuna individuala duai star davos l’uffizi. En sia posiziun-clav garantisce ella il principi da respectar e resguardar ils auters en nossa societad sco era las diversitads e las structures da noss pajais. Corina Casanova s’engascha per las valurs helveticas cun insistenza e vusch clera, cun vigur or da l’emprima retscha, senza mai exagerar. Sinceras gratulaziuns à dunna Corina Casanova per il Premi SRG.R bain merità!

Sco regal surdat il president Oscar Knapp ina litografia dad Alois Carigiet e flurs a la chanceliera federala.

Dunna Corina Casanova engrazia ed exprima ses plaschair sur dal premi. Ella pensa en quest mument a sia famiglia ed als geniturs che han sustegnì ella en sia via e partan muments impurtants cun ella. Il premi è era ina renconuschienscha per ses collavuratur. Avair l’ocasiun da s’engaschar per las linguas, oravant tut per il rumantsch, resguarda Corina Casanova sco in privilegi. Ella è cuntenta da pudair far insatge per il rumantsch a Berna, e facilitar cun quai comunicaziun ed interacziun. Las differenzas sun in stgazi cultural svizzer e la plurilinguitad enritgescha noss pajais. Oscar Knapp engrazia a Mariano Tschuor per la laudatio.

L'onuraziun da dunna Corina Casanova vegn embellida da chanzuns rumantschas e franzosas da Mario Pacchioli.

6. Varia

Il president Oscar Knapp engrazia a dunna Clara Gerber, l'antieriura secretaria da direcziun RTR e SRG.R, e surdat ina renconuschientscha per sia lavur excellenta durant blers onns.

Dunna Angelica Biert giavischa a Ladina Heimgartner plaschair e bler curaschi per las sfidas che spetgan la direcziun RTR. Ella fa quai cun ina poesia adattada dad Andri Peer:

Quai chi'ns mangla, amis, ais curaschi.

Curaschi da tour il pled intant ch'el ais bugliaint;

da nomnar la peidra peidra, e'l sang sang, e la temma temma.

Ûn di gnarà la naiv gronda, e lura, aint il sbischöz, saraja grev, da's dar d'incleger.

Signur Duri Bezzola, president da la Lia Rumantscha (LR), porta ils salids da la LR. RTR è in pilaster fitg impurtant per mantegnair e sviluppar il rumantsch. Turitg sco lieu per la radunanza generala è tschernì bain, igl è impurtant per la LR da resguardar ils millis da Rumantschs en la Bassa. La LR vul resguardar tant uffants sco creschids. Era Duri Bezzola ha passentà si' uffanza a Turitg. Duri Bezzola engrazia fitg ad Oscar Knapp ed a Ladina Heimgartner cun tut ils/las collavuraturAs da RTR per la buna collavuraziun cun la LR.


Il president Oscar Knapp engrazia a tut quels ch'èn vegnids giu da nossas vals fin a Turitg ed anc ina giada spezialmain era a la diaspora rumantscha. El engrazia ad Anna Maria Ratti ed a las collavuraturas e collavuraturS da RTR, da tpc e dals Studios SRF. In engraziament spezial va a la directura Ladina Heimgartner ed a tut il team da RTR per lur grondiusa lavur sco era al directur da SRF, signur Ruedi Matter, ch'è stà durant ils dus dis en noss ravugl.

Il program cuntinuescha sco suonda:

- Visita studios SRF u pitschen aperitiv
- Gentar en il restaurant SRF (2. auzada) a partir da las 13:30.

La radunanza generala vegn serrada a las 12:15.

Per il protocol:



Oscar Knapp
President SRG.R



Anna Maria Ratti-Duschletta
Manadra dal post SRG.R